

2 Tesalonia Mahãdu-ò

2 Paulo Ryberiti Tesalonia Hãwã-ò

1 ¹ Paulo, Sila, Tximòtxiboho-wana tyriti rewahinyrenyre Tesalonia dohodỹna mahãdu-ò. Deuxu Inytyby, Jesuisi Kristu Inynyrỹ ijoi toiteò. ² Wiòhedỹna, ywina-wana adeereny kanakemy watzireri Deuxu Inytybyreny-ribi, Jesuisi Kristu Inynyrỹreny-ribi.

³ Inyseriòreny, Deuxu-ò adee reàlamahãrenyre. Kia tahe awi rare. Kaiboho aõu aõu textyhydỹnytyhymy atximahãtenyteki, ityhydỹydu seriòre wiluuna-di iluutyhymy teletenyteri. ⁴ Tai heka ijò Deuxu dohodỹna heto-ki aõwiihikỹmy umy rarybemahãre. Kaiboho dori aõwitxira witxira aõbina bina teòludunymyhỹtenynte, aõhòkỹmy dỹnana-ki ixiwesehymy toitemahã ire tetyhynytyhymahãtenynte. ⁵ Kiawesele Deuxu aõna aõna òbitimy riwinymyhỹre. Kaiboho Deuxu teywinytenyteri Iòlòna-ò malòbenykremy, aõhòkỹmy tatỹnytenyteriki wahe. ⁶ Deuxu, tiiboho aõbina bina-di riòwynyrenykre, aõhòkỹmy dỹnana dori adeereny riwahinyreki. Kia tii òbitimy ròhòtinyre. ⁷ Biu-ribi Inynyrỹ Jesuisi tarurunareny ýju-di kodobehekreu, aõhòkỹmy dỹnana-ribi elehyna adeereny, tule inydeereny Deuxu kidiwahinykre. ⁸ Heòtyloona-di tii kanakre riòwynykremy Deuxu rieryõmy rỹira mahãdu dee, tule Inynyrỹ Jesuisi Rybewihikỹ riywinyõmy rỹira mahãdu dee. ⁹ Kia mahãdu aõu aõu aõhòkỹmy rotỹnykre Inynyrỹ òsỹnỹ-ribi iteòdỹna-ki taruruloosõna-ribi. ¹⁰ Tii kanakre tahe ibutumy ijoi mahãdu tamy làhàna riwahinykremy. Ribedeòtiidỹnyrenykre ibutumy taijoi dee aõmydỹnana riwinyreki. Tetyhynymahãtenynte, Deuxu rybe dori jiarỹboho adeereny rewahinyamahãreki. ¹¹ Kaiboho iwese Deuxudeewimy rarekemy boibeke. Tai tahe adeereny rexitòdehymahãrenyre. Deuxu ruruna-di atyhydỹna-di sòwemy aõwiihikỹ riwinykemy idi watzimahãre. ¹² Tai tahe ibutumy Inynyrỹ Jesuisi Kristu nimy sòwemy beàlamyhỹkemy. Tii loosõna adeereny riwahinykemy watzireri. Kia Deuxu dee, Inynyrỹ Jesuisi dee awi rare. Wiòhedỹna iribi bitabenyke.

2 ¹Waseriòreboho, Inynyrỹ Kristu òkesenamy iximy iny ritakemy adeereny warybe ariwahinykre. Inyõ rarybekeki Inynyrỹ òkesena txumy rehemynomy rỹire, kia rybe-di iõtidiỹõmy. ²Inyõ rarasinykeki, Deuxu-ribi ijyy ritakeki, urile ityhydỹõmy. Inyõ waribi tyriti itarasamy rarybekeki, ityhydỹõmy. ³Inyõ aitxenadỹõmy boibeke. Ityhydỹõdu atysyna nihikỹ juhoo kanakre, idi tahe kia txu kanakre. Juhoo hãbu ibinatyhy kedexideòsinykre. Heòtybedeluduò tii rare. ⁴Tii ibutu Deuxumy òludunadu rarekre Deuxumy iny rininire mahãdu wahe. Ibutumy àlana aõmydỹõnana riatykre. Deuxu dohodỹõna hetowo-ò ralore tahe Deuxu weselemy ronykre. Iximy rarybekre tii Deuxu raremy. ⁵Tuu heka adeereny rarybere, akireny raremahãu, õhõtireny aõbo itxi rearenỹõra? ⁶Ibededỹõnana raòbitikre xiery, kanakre. Deuxu ruru dori rimymyhỹre. Kia tule teerytenyete. ⁷Iaõbinahakỹ aõmydỹõnana inyy-ki ratxireri. Tii tyhy wiji kanaòkre. Imynydu iribi rexitare xiery, tahe tii kanakre. ⁸Taile tahe hãbu ibinatyhy kedexideòsinykre. Inynyrỹ Jesuisi kanakreu, tii tuu kidirubunykre taryeledile. ⁹Juhoo tahe kia hãbu Satanasi deòdu tahe iruru-di kedehemynykre. Aõna aõna wiwihikỹ widỹõmy ròitxenadỹõreri. ¹⁰Inyõ sòwemy riitxenanykremy bedeòbydỹõ wesemy. Ityhydỹõdukòdu mahãdu tii riitxenanytyhykre. Tiõboho dori inatyhyna rybe rityhynyõmyhỹre, tuuõmyhỹre, tai rexirutaòreny. ¹¹⁻¹²Deuxu dori rilawere tuu rityhynyrenykremy ibinare hãrele. Kia ruina rityhynyrenykre, tai Deuxu rihitxidỹõnykre inatyhyna rityhynyòreki, taòrarudỹõna luureki.

¹³Deuxu tahe juhuutyhylemy aratareny, waseriòreboho. Biu-ò hena adeereny riwahinyremy inatyhyna tetyhynytenyete. Deuxu Tyytybytyhy aralyradỹõnyreny. Tai, Inynyrỹ luuna mahãdu, Deuxu mahãdurenymy belebenykemy atximahãtenyete. ¹⁴Deuxu adeereny Rybewihikỹ diteònyde. Inyboho tahe ijyydumy roire. Iny òrarureny-ki tahe Inynyrỹ Jesuisi Kristu loosòna bitabenykremy idi toite. ¹⁵Kia ibutumy, waseriòreboho, itxi õhõtireny reake. Aõmybo araerynanymahãre kowa-ki raremahãu, tule watyriti-di rebedeerydỹõnymahãreny, idi mohõtinytyhybenyke, òbitimy idi boibeke.

¹⁶⁻¹⁷Inynyrỹ Jesuisi Kristu Deuxu Inytyby, luuna luuna, wiòhedỹõna, raròsòna sòwemy inydeereny diwahinyde. Inyboho aõhyymy aòkò roire. Iribireny raybidina adeereny kanakemy watzireri. Tule umy kanawiòhenanykemy watzireri ibutumy aõhe botynyke, marybemahãbenyke.

3 ¹Watyriti-di konanamy tahe adeereny ararybekre. Waseriòreboho, inydeereny bexitòenyke. Inynyrỹ rybemy araryberenykemy, inywitxira-ko arelyyrenykemy, tule Inynyrỹ rybe-di iwese rybe ayreny-ki aõwiwihikỹmy raremyhỹ wese. ²Tule bexitòenyke kia iny iehehe-ribi arexitarenykemy. Ibutu iny dori inatyhyna rityhynyòreri. ³⁻⁴Tahe Inynyrỹ òbiti rare tii arawiòhenanykre. Tii ararurudỹõnykre kia reeryre. Satanasi-ribi arayrubunyrenykre. Tahe, aõmybo reernadỹõnyre wese kaiboho aõhebo tatỹõnytenyterimy heka adireny watximahãre tule kia wesehyyle rakatxirenyke. ⁵Inynyrỹ-ribi Deuxu luuna, Kristu itxõmotxina bede erynahakỹ adeereny kanakemy watzimahãre.



(2 Tesalonia-ò 3.8)

⁶Kia Jesuisi Kristu Inynyrĩ bede ywina wese rare adeereny ararybekremy. Waseriòreboho bexiweresyntyke iny deoruxere-ribi, ibutumy iny waerysydỹna roholaõre mahãdu-ribi, tii ityhydỹdu mahãdu hãrele. ⁷Ayreny-ki roiremahãu, raaõmysỹdỹhyymy roiremyhỹ. Tai kaiboho teerytenyte iwese mabekemy. ⁸Tiu iny wixira rỹsỹna rerỹsỹrenyõhyyre, iõwyõmy. Txuu ruwana raaõmysỹdỹre waaõna aõna õwydỹmy. Tai tahe adeereny isiramy aõkõ ayreny-ki jiarỹ raremyhỹ. ⁹Inyõ-ribi rỹsỹnaõ arirỹsỹmahãkeki, kia tahe ibinamy aõkõ rare, jiarỹ Deuxu rybemy rybedu-ki wahe. Tahe aõkõre urile rexidedõsinykemy rerỹsỹõmahãrenyre. Iwese aõmysỹdỹna awirewesele umy reernanyrenyre. ¹⁰Tai rarewãhãu kia bede ywina rewahinyre: —Iny raaõmysỹdỹõmyhỹre riroxiõtyhy. ¹¹Jiarỹ raholawãhãre iny deoruxeretyhy-ò ayreny-ki ratximyhỹrenyre, tiiboho aõmysỹdỹ derarenyre, urile raujõmomyhỹrenyre. ¹²Jesuisi Kristu Inynyrĩni-di tamyreny ararybekre rayruburenykemy, raaõmysỹdỹrenykemy ixideereny. ¹³Tahe adeereny, waseriòreboho, ararybekre. Aõwiwihikỹ widỹ-ò ixirarenyõmy. ¹⁴Inyõ ka waryberiti riywinyõkeki, mobo tii rare bierybenyke tahe kie-ribi irehemy bijeje, tai tii raixỹrukemy. ¹⁵Urile tii aõludumy aõkõ ratxireri. Aseriòre wesemy tamy marybeke. Bijemy idi ahãke. ¹⁶Inynyrỹ ywina wedu rare. Tii adeereny ywina ibutumy aõmydỹnana-ki kidiwahinykemy idi watzireri. Inynyrỹ awanareny ratxikemy idi watzireri. ¹⁷Kia konana warybewehityyna jiarỹle aritinykre wadẽbõ-di. Ibutumy waryberiti-ki rỹire wese kawesele wani retidire. Paulo. ¹⁸Jesuisi Kristu Inynyrỹ wiõhena ibutumy adeereny ratximyhỹkemy idi watzireri.